

## **E Kremtja - Krishti Mbret i Gjithësisë 21 Nëntor 2010**



*Të krishterët kanë një mbret të çuditshëm, ndjekin një Zot që nuk ushtron atë fuqi që ushtron një njeri i fuqishëm dhe mbizotërues. Ati i shpallur prej Jezusit është i mëshirshëm, plot me da-shuri e besnik dhe nuk tregton faljen dhe dhuron krejt vetveten deri në fund.*

*Mbi kryq dashuria hyjnore shfaqet deri në fund dhe përmbys çdo imazh të rremë që do të mund të kemi për Hyjin.*

*Por, nëse ndjekim Atë që nuk shpëton jetën e vet, por e dhuron, nuk kemi rrugë tjetër përveç se të shërbejmë dhe të japim jetën për të qëndruar në anën e Zotit. Një i Kryqëzuar është mbreti ynë. Të gjithë ne do të donim një Mesi që shpëton vetveten, me*

*fuqi e sundim, sipas pritjeve tona.*

*Dhe në fakt ky i Kryqëzuar nuk ka dashur të ç'gozhdohet nga kryqi, duke u bërë Zoti ynë i vetëm dhe i vërtetë. Të pranosh që Krishti është mbret e Zot, domethënë t'i nështrohesh mbretërisë së tij; domethënë ta pranosh si Zotin "tënd"; domethënë të jesh shërbëtor i Krishtit Mbret e i askujt tjetër!*

*Krishti pikërisht mbi pemën e kryqit lufton deri në vdekje kundër Djallit, i cili nën pemën e Edenit kishte gënjyer njeriun. Ai mund fuqinë e Djallit e shpëton njeriun. Edhe njëri prej dy hajdutave të kryqëzuar bashkë me të rrëfen mëkatet e tij, shpall besimin e tij në Jezusin dhe shpëton. Adami u kishte mbyllur të gjithëve dyert e parajsës, Jezusi, fitues mbi mëkatin, vdekjen dhe Djallin, u hap dyert e parajsë edhe mëkatarëve më të mëdhenj.*

### **LITURGJIA E FJALËS**

#### **Leximi i parë 2 Sam 5, 1-3**

*Davidi ka fituar famë si luftëtar i pathyeshëm. Fiset e veriut duan një kryetar që i mbron dhe i kërkojnë Davidit nëse do të jetë mbreti i tyre. Ai pranon, por nuk ka asgjë fetare në këto ngjarje.*

*Megjithatë Hyji nëpërmjet lojës së ngjarjeve politike, përgatit ardhjen e Mesisë.*

#### **Lexim prej Librit të dytë të Samuelit**

Në ato ditë, erdhën të gjitha fiset e Izraelit te Davidi në Hebron dhe i thanë: "Ja, ne jemi ashti yt dhe mishi yt. Po edhe më parë, kur Sauli ishte mbreti ynë, ishe ti ai që i drejtoje të gjitha lëvizjet e Izraelit.

Edhe Zoti të ka thënë: 'Ti do ta kullotësh popullin tim Izraelin dhe ti do të jesh prijës mbi Izraelin'." Po ashtu erdhën edhe të gjithë pleqtë e Izraelit te mbreti në Hebron, dhe Davidi mbret lidhi besëlidhje me ta në Hebron në praninë e Zotit. Ata e lyen Davidin mbret përmbi Izraelin.

#### **Fjala e Zotit.**

#### **Psalmi 122**

#### **Ku është Zoti, aty mbretëron paqja**

Sa u gëzova kur më thanë:

"Eja të shkojmë në Shtëpinë e Zotit!"

Ja, tashmë këmbët tona shkelën  
në dyert e tua, o Jerusalem!

-----  
O Jerusalem, qytet i ndërtuar me mjeshtëri,  
thuj se i tëri një copë të vetme je!  
Atje ngjiten fiset, fiset e Zotit,  
sipas rregullores në Izrael,  
për të kremtuar Emrin e Zotit.

-----  
Atje janë selitë e gjykatores së drejtësisë,  
selitë e shtëpisë së Davidit!  
Lutuni për paqen e Izraelit:  
“U priftë e mbara atyre që të duan ty!”

### **Leximi i dytë Kol 1, 12-20**

*Kolosianët imagjinonin se energjia hyjnore përhapej nga Hyji tek engjëjt, njerëzit, lënda dhe mendonin të vendosnin Krishtin në këtë shkallë hierarkike. Pali kundërshton dhe dënon këtë konceptim mbi krishtërimin. Edhe sot rikthehet tundimi për të futur Krishtin në një filozofi njerëzore, të ndërtuar jashtë Ungjillit. Krishti vendoset në një nivel tjetër: Ai është i parëlinduri i njerëzimit dhe e shpëton prej vdekjes.*

### **Lexim prej Letrës së shën Palit apostull drejtuar Kolosianëve**

Vëllezër, ta falënderojmë Atin, i cili ju bëri të aftë të keni pjesë në trashëgiminë e shenjtëve në dritë. Ai na nxori nga pushteti i errësirës dhe na kaloi në Mbretërinë e Birit të vet të dashur, në të cilin kemi shpërblimin, faljen e mëkateve.

Ai është shëmbëllesha e Hyjit të papashëm, i parëlinduri, para çdo krijese. Sepse në Të u krijua çdo gjë në qiell e në dhe, çka shihet e çka nuk shihet: qoftë fronet, qoftë zotërimet, qoftë principatat, qoftë pushtetet: gjithçka u krijua nëpër Të dhe për Të. Ai është para çdo gjëje dhe çdo gjë qëndron në Të. Ai është Kryet e Trupit, Kishës; Ai është fillimi, i parëlinduri ndër të vdekurit, që të jetë në gjithçka i pari. Sepse Hyjit i pëlqeu të banojë në Të e tërë plotësia dhe, me anë të Tij, duke vendosur paqen me anë të gjakut të kryqit të Tij, të pajtojë me vete gjithçka, qoftë në tokë qoftë në qiell.

### **Fjala e Zotit.**

#### **ALELUJA, aleluja.**

Qoftë bekuar Ai që vjen në Emër të Zotit!

Qoftë bekuar Mbretëria e Tij që po vjen.

**Aleluja.**

### **+ Ungjilli Lk 23, 35-43**

*Mundimet e Krishtit te Luka janë përshkruar me optimizëm. Ndërsa kryetarët e popullit shprehin urrejtje dhe ironi, populli qëndron i pa gojë duke e kundruar. Është shumë domethënës dialogu i Jezusit me dy hajdutët: Krishti, megjithë mundjen, madje nëpërmjet saj, triumfon mbi të keqen dhe dhuron mëshirën e tij, duke u bërë kështu Zot i qiellit dhe i tokës, burim i shpëtimit për të gjithë.*

## **Leximi i Ungjillit shenjt sipas Lukës**

Në atë kohë, populli rrinte aty e po kundëronte. Anëtarët e Këshillit të Lartë e përqeshnin duke thënë: “Tjerët i shpëtoi, le ta shpëtojë vetveten, nëse është Mesia i Hyjit, i zgjedhuri!” Edhe ushtarët e vinin në lojë. Iu afruan për t’i dhënë uthull dhe i thanë: “Nëse je ti mbreti i judenjve, shpëto vetveten!” Mbi të ishte edhe mbishkrimi: “Ky është mbreti i judenjve.”

Njëri nga kriminelët e kryqëzuar e fyente: “Po a nuk je ti Mesia?! Shpëto veten edhe ne!” Por ai tjetri e qortoi shokun: “As ti nuk e druan Hyjin që po vuan të njëjtin dënim si ai? Sa për ne kjo është drejtësi: po marrim ndëshkimin e merituar për veprat tona! Por ky – ky s’bëri asnjë të keqe!”

Dhe tha: “Të bie ndër mend për mua, o Jezus, kur të arrish në Mbretërinë tënde!” E Jezusi i tha: “Për të vërtetë po të them: sot do të jesh me mua në parriz.”

### **Fjala e Zotit.**

#### **PREDIKIMI:**

Sot është e diela e fundit e vitit kishtar, kur krejt Kisha Katolike feston festën e Krishtit, Mbret të qiellit dhe të tokës.

Fjala mbret sot e ka një domethënie mjaft negative në kujtesën e popullit. Edhe përpara ishte ashtu, sidomos në kohë derisa israelasit ende nuk kishin mbret. Kur disa deshën ta zgjidhnin mbretin, të tjerët (e ndër ta edhe profeti Samuel!) këshillonin që mos ta zgjedhin, sepse rrezik është të lartësohet një njeri përmbi të gjithë të tjerët: rrezik edhe për të, edhe për popull, sepse mbreti mund të bëhet mendjemadh dhe të vendosë vetveten në vendin e Zotit, sikurse kanë bërë disa mbretër të Egjiptit, të Romës, të Babilonisë etj.

Njëkohësisht edhe populli do të vuajë shumë nën sundimin e mbretit të tillë dhe gjithmonë do të jetë në rrezik të largohet prej një të vetmit Mbret të vërtetë, prej të Madhit Zot.

Mirëpo, më vonë fjala mbret fiton domethënie pozitive: Mbreti David nuk lartëson vetveten përmbi të tjerët, por vetë populli vjen dhe i thotë: “*Qe, ne çmojmë veten pjesë të ashtit tënd dhe të mishit tënd*” – dhe e lut që ta pranojë mbretërinë. D.m.th. ashti i tyre dhe mishi i tyre fiton nderin e mbretit. I tërë populli merr pjesë në nderin mbretëror.

Jezu Krishti është pasardhës i Davidit. Sikur Davidi, po ashtu edhe Krishti kishte të njëjtin trup dhe të njëjtin gjak sikur ne. Sikurse në Davidin i tërë populli disi fitoi nderin mbretëror, edhe më tepër nëpër Krishtin të gjithë ata që besojnë në të, lartësohen. Ata bëhen jo vetëm pjesëtarë të natyrës së tij hyjnore, sikurse ai u bë pjesëtar i natyrës sonë njerëzore, por bëhen edhe bij dhe bija të adoptuara të Hyjit – dhe trashëgimtarë të Mbretërisë qiellore.

Disa mendojnë se kjo, nëse bëhet!, do të bëhet në mbarimin e botës, ditën e ringjalljes prej të vdekurve. Fakt është se atë ditë do të jetë mbarimi, përfundimi i bashkëtrajtimit tonë me Krishtin. Ndërkaq, pjesëmarrja jonë në mbretërinë e Krishtit fillon që tani, në këtë jetë. Sepse çdo kthim kah Zoti është një ringjallje e vogël. Çdo rrëfim është një hap më thellë në Mbretërinë e Krishtit. Çdo kungim na bën më të ngjashëm me Krishtin Mbret, më pjesëtarë të jetës së tij hyjnore.

E si duket Krishti Mbret?

Kjo më së miri shihet në Ungjillin e sotëm: **Krishti mbretëron prej kryqit. Kryqi është fronti i tij. Derisa mbretërit tjerë sundojnë me dhunë, Krishti sundon me dashuri. Derisa mbretërit e tjerë i ndëshkojnë nënshtetasit e vet, Krishti Mbret pranon dënimin e tyre në vetvete. Derisa të tjerët e sakrifikojnë popullin e vet për të shpëtuar vetveten, Krishti**

Mbret flijon vetveten për të shpëtuar popullin. Derisa pushteti i kësaj bote dënon kriminelët për vdekje, Krishti Mbret cubit të penduar i premtton parajsën – jo dikur pas mbarimit të botës, por pikërisht sot!

Edhe Krishtin e tundonin sipas teologjisë pagane: Zbrit prej kryqit, shpëto vetveten – sikurse bëjnë mbretërit e tjerë, dhe do të besojmë se je Mbret, Biri i Hyjit, Zot. Por teologjia e krishterë thotë: jo s`dua, do të qendrojë në kryq. Krishti nuk zbret, por vdes në kryq – që të jetë përgjithmonë Mbret: jo jashtë popullit dhe mbi popull, por me popullin dhe për popullin e vet. Kjo na mëson se kryqi është pjesë përberëse e jetës së krishterë. Kryqit duhet dhënë kahje të mirë dhe nepër mes kryqit arrihet mbretëria e Zotit.

Ne jemi pjesëtarë të Mbretërisë së Krishtit. Krishtin e kemi Mbret, por edhe vetë jemi popull i shenjtë, meshtari mbretërorë... Edhe ne shpesh jemi në tundim të zbresim prej kryqit, të shpëtojmë vetveten, ta lehtësojmë barrën, mos t'i kryejmë obligimet tona fetare, mos të lutemi, mos të agjërojmë, mos të punojmë, mos të pajtohemi, mos të falim, t'u përngajmë atyre që nuk besojnë në Hyjin, që nuk besojnë në Krishtin Mbret.

Nëse bëjmë ashtu, me të vërtetë do të mbesim jashtë Mbretërisë së tij. **Sikurse Krishti nuk zbriti prej kryqit, as ne nuk guxojmë të zbresim! Jemi besnikë vetëm derisa jemi në kryq!**

Nëse në këtë jetë qëndrojmë bashkë me Krishtin në kryq, në botën tjetër do të mbretërojmë bashkë me Të: do të gëzojmë lumturinë e amshuar në anën e djathtë të Hyjit, Atit të gjithpushtetshëm!

*Amen. Ashtu qoftë!*

### **Lutja e Besimtarëve**

**M.** *T'ia drejtojmë me besim lutjet tona Krishtit Mbretit të Gjithësisë, që, me anë të kryqit të tij të lavdishëm, të ripërtërijë të gjithë njerëzimin në drejtësi e në paqe. Të lutemi së bashku e të themi:*

***Ardhtë mbretëria jote, o Zot.***

-----  
1. O Zot Jezus, shikoje këtë Kishën tënde: drejtoje në rrugën që të dërgon në shpëtimin e amshuar. Të lutemi

***Ardhtë mbretëria jote, o Zot.***

-----  
2. O Zot Jezus, Mbret i Gjithësisë, bekoju mbarë popujt dhe përhape Mbretërinë tënde të dashurisë, të drejtësisë dhe të paqes mes gjithë qytetarëve të saj. Të lutemi

***Ardhtë mbretëria jote, o Zot.***

-----  
3. O Zot Jezus, ngushëlloji ata që vuajnë: bëj që ata që jetojnë të poshtëruar në dinjitetin e tyre dhe të shtypur në të drejtat e tyre të gjejnë forcën të shpresojnë në një të nesërme më të mirë. Të lutemi

***Ardhtë mbretëria jote, o Zot.***

-----  
4. O Zot Jezus, na jep solidaritet të plotë me njerëzimin e vuajtur, që troket në portën tonë: bëj që të angazhohemi në emrin tënd, duke fituar çdo respekt njerëzor. Të lutemi

***Ardhtë mbretëria jote, o Zot.***

-----  
5. O Zot Jezus, tregoje mëshirën tënde mbi këtë bashkësi: bëj që, duke ndjekur shembullin tënd, të jetë dëshmitare profetike e dashurisë sate që shpëton. Të lutemi

***Ardhtë mbretëria jote, o Zot.***

-----

**M.** O Hyj, Atë i Jezu Krishtit Mbret i Gjithësisë dhe Zot i historisë, që ke pranuar lutjen e hajdutit të mirë, dëgjoji me mirësi kërkesat që të drejtohen Ty nga zemrat e besimtarëve të tu. Nëpër Krishtin Zotin tonë.

Amen

+ + + + + + +

### Lutu me Ungjillin

Jezu Krisht Zot,  
Ti je Mbreti ynë që prej amshimit,  
sepse që prej amshimit  
na udhëheq me forcën e mëshirës sate.

Mbretëria jote nuk të largon prej nesh,  
por na bën të ndjejmë afërsinë tënde,  
sepse Ti je Mbret mbi kryq:  
nuk ke shpëtuar vetveten, por të gjithë ne.

Ty, që je Hyji dhe ke marrë mbi vete mjerimin tonë,  
të shikojmë me shpresë dhe besim  
dhe të kërkojmë të na udhëheqësh drejt Mbretërisë sate,  
shtëpia e gëzimit të vërtetë që është zemra jote.

+ + + + + + +

Sipas: **E Diela: dita e Zotit** ([dehon.albania@yahoo.it](mailto:dehon.albania@yahoo.it))

-----  
Leximet e Meshës dhe predikimin (nga tani e tutje shikoni):

[www.kisha-katolike-gjakove.com](http://www.kisha-katolike-gjakove.com)

Ungjilli i së dielës – Viti 2007  
-----